

Powšitkowne WOZJEWJENJA

njedźelu, 1. januara 2012

TCM-„Łužica pomha“ prosy wo šćedriwe dary“

Towarstwo Cyrila a Metoda z.t. (TCM) chce ze swojej lětušej hodownej pomocnej akciju „Łužica pomha“ dźěło zhromadnosće „Asociacija Jana XXIII.“ w Elisće podpěrać. Tale zhromadnosć w stolicy dźělneje republiki Kalmykije w juhu Ruskeje wudźeržuje domy, w kotrychž najchudšich mjez chudymi přiwozmu. Prosimy wo šćedriwe dary na konto Cyrill-Methodius-Verein, kontowe číslo 828 23 66, BLZ 750 90 300 pola banki LIGA pod hesłom „biskop Pickel“. Darjene pjenjezy přepokazaja so biskopej Clemensej Picklej, zo by je zhromadženstwu sposrědkował.

Jurij Špitank, předsyda TCM

Hodowny nyšpor z chórom Lipa w Róžeńće

Chór Lipa wuhotuje njedźelu, 1. januara, w 17.00 hodź. w Róžeńčanskej cyrkwi tradicionalny beneficny nyšpor. Zaklinča mjez druhim hodowne a sakralne chórowe kaž tež instrumentalne twórby. Zběrka při durjach budže za Róžeńčansku swjatnicu.

Hodowny koncert w Chróścicach

Tradicionalny hodowny koncert Chróšćanskeho cyrkwinskeho chóra wotměje so njedźelu, 8. januara, w 14 hodź. w tamnišej wosadneje cyrkwi. W srjedžišću steji lětsa barokowa hudźba 17. a 18. lětstotka. Najwažniša hudźbna forma tuteje doby su cyrkwinske kantaty. Na lětušim koncerće w Chróścicach změje hodowna kantata Vincenta Lübecka „Witamy tebe, Zbóžniko“ swoju serbsko-rěčnu premjeru. Teksty tuteje twórby je Bernadet Hencyna do serbsčiny přenjesła. Dale zaklinči w programje mjez druhim „Magnificat anima mea“ wot Christopa Graubnera. Koncert, na kotrymž tež instrumentalisća a solisća z Drježdžan sobu skutkuja, nawjeduje Bernadet Hencyna. Wšitcy zajimcy su wutrobnje do Chróścic přeprošeni.

Kubłanskej dnjej

Pod hesłom „Žiwjenje je krasne – wo lubosći a druhich wěcach“ přeprošuje dekanatne dušepastyrstwo šulerki a šulerjow 7. a 8. lětnika wot pjatka, 27. januara, we 18 hodź. do soboty, 28. januara, w 16 hodź. do Don Boskowneho domu we Worklecach. Zajimcy njech so prošu hač do pjatka, 20. januara, pod telefonowym číslom (03 57 96) 8 87 07 we Worklecach přizjewja.

Nowa wjeselohra „Naša ćeta Mija“

Dźiwadłowa skupina Kulowskeho Bratrowstwa přeprošuje wšitkich wutrobnje na wjeselohru „Naša ćeta Mija“, kotrejež premjera budže sobotu, 7. januara, we wobłuku lětneho swjedženja Bratrowstwa w Sulšecach. Dalše předstajenja budu njedźelu, 8. januara, w 16.30 hodź. w Salowje; pjatk, 20. januara, w 19 hodź. w Njebjelčicach; sobotu, 21. januara, w 19.30 hodź. w Chróścicach; njedźelu, 22. januara, w 16.30 hodź. w Radworju; njedźelu, 29. januara, w 16 hodź. w Haslowje, njedźelu, 26. februara, we 18.30 hodź. w Šunowje a njedźelu, 11. měrca, w 17 hodź. w Kulowje.